

大

觀

錄

大觀錄北宋諸賢法書卷四目錄

李西臺六帖卷

李諫議銅魚詩帖

孫樞副鈐轄帖

宋宣獻度支帖

宋龍圖稚卿帖

李祕書賤息帖

葉學士天休帖

遣幹帖

大旆帖

林和靖二札卷

韓魏公二帖卷

王文公湖北札

孫侍讀子溫帖

富鄭公修建帖

文潞公祠部帖

范文正公與尹師魯二札卷

范忠宣日企帖

范侍郎故人帖

韓康公從事帖

冲師詩帖

韓太祝留守帖

韓中書欽聞帖

趙清獻山藥帖

張文定留錢塘帖

沈學士屯田帖

歐陽文忠上恩帖

曾舍人局事帖

曾學士益友帖

曾樞密嚮往帖

知府帖

質夫帖

王懿敏陝右帖

錢待制公默帖

司馬溫公題跋帖

兩淮帖

陳謝帖

范學士公休帖

錢學士起居帖

知郡帖

呂肅穆子安帖

章學士承示帖

唐中允征局帖

蒲右丞夏中帖

王宗丞方面帖

冷淘帖

王學士觀察帖

王右丞朝散帖

李商老公關帖

劉無言侍坐帖 牛尾帖

邵直閣到京帖

呂汲公尙書帖

蘇僕射守郡帖

王樞密慶牋帖

趙郡王蒙餉帖

林副樞風範帖 完夫帖

蔣樞密辱書帖 九兄帖

呂待郎蒙恩帖

李朝請別紙帖

孔待制莘民帖

陳忠肅嚴寒帖

陳侍御名醪帖

蔡丞相節夫帖

蔡樞密雪意帖

張丞相收錄帖

章丞相會稽帖

張諫議東來帖

潭州帖

劉少保褒除帖

劉侍御穎叔帖

林樞密右司帖

陳待制詩帖

薛修撰三詩帖

李殿中鄰蔭帖

周待制頓首帖

大 舊 金 目 鏡

何侍郎屏居帖 卽辰帖

三 怡 寄 軒

大觀錄北宋諸賢法書卷四

吳郡吳升子敏彙輯

李西臺六帖卷

西臺六帖引首有隸書五字土母帖白紙本高九寸一分闊一尺三寸行草書大五分計十行同年帖雲箋有曲脚封字印貴宅以下紙色不一書體淳厚得唐人韻宋元跋品隲精當西臺董狐也

李西臺六帖

土母帖

所示要土母今得一小籠子封全諮送不知可用否是新安缺門所出者復未知何所用望批示春冬衣歷頭賢郎未拾到其宅地基尹家者根本未分明難商量耳見別訪尋穩便者若有成見宅子又如何細希示及 亦押諮



孫號西行少車今有舊車如到彼不用可貨却也

同年帖

金部同年載喜披風甚慰私抱殊未款曲旋值睽離必然  
來晨朝車行邁適蒙示翰愈傷老懷惟冀保愛也萬萬不  
勝銷黯見女夫劉仲謨秀才并第二兒子在東京相次發  
書去如有事希周庇也建中簡上

金部同年 九月十六日湯世帖碑文三道路表西京之  
物也懷湘南拙詩附上同院劉學士隲同年邵兵部希差  
人通達或與面聞也建中又白封

貴宅帖

貴宅諸郎各計安侍奉所示請改章服昨東封須得出身  
歷任家狀一本并須齎擎官誥敕牒去未審此來如何行  
遣也兼爲莊子事已令彼僧在三學院安下近已往彼去

未迴此莊始初見說甚好只是少人管勾若未貨可且收拾課租亦是長計不知雅意如何也侯親家亦云可惜拈却 亦押諮劉秀才久在科場洛中拔解今西遊兼欲祇候府主希略一見也

屯田帖

建中白近賢郎秀才去專馳手書伏想已達左右玄律將半陰風向嚴公理之外道養無爽此離羣寡侶望風懷賢無日不然也時光流速同年知心凋落大半耳加之宦途人事何牽纏至是哉惟再三保愛虔禱虔禱因人無恡玉音今左十秀才行謹寓狀諮問起居不宣同年兄李建中狀上 屯田仁弟 十一月十一日

左右帖

左右爲河中有少里會家業被人羅織公途甚是分明希

特與照燭也建中白

齊古帖

齊古同年仁弟相別已是隔年傾渴可量丹訣累垂示翰益認道友劣兄自去秋患脾胃氣于今餌藥未獲全愈復差出淮汴口祭醮然無力祇候迴來冷氣又是發動歸休之計未成多難故也此外別無疾嗜慾已絕訖知仁弟又鼓盆莫且住脚也初夏惟保愛爲切值女夫劉先輩補吏照應託寓狀諮問起居不宣 亦押書上

齊古同年仁弟 三月六日 近蒙寄到書開却封却恐是留臺陳公也已附西京去要知之

西臺字得中舉進士甲科太宗嘉之嘗直昭文館改直集賢院出爲兩浙轉運副使恬於營利乞西京留司御史臺愛洛中風土遂居之故號李西臺東坡賦和靖詩

云書似西臺差少肉者是也官至判太常寺善書札然絕不多見於世寶祐乙卯夏五建寧堂主題建袁立儒溪翁黃太史嘗有跋云李西臺書與林和靖極相類但和靖傷瘦西臺傷肥蓋林處士清苦而李集賢重厚各似其作人耳建寧堂主并錄其語

予近得華山圖題曰崧高維嶽歐陽公所記神清之洞及李西臺隱居之地在焉軸尾載西臺卜築始末甚詳此帖出於西臺逸筆無可疑者前史官文及翁書

西臺書三十年前極罕得見近數數見之大概雄實篤厚如其人涪翁傷肥之論無乃太嚴此六帖信意行筆天真爛漫尤可愛世謂平園攻媿後邨不善書輒欲評書予之謂歟杭仇遠

李西臺吾鄉有石刻徑三寸許今見真跡遒勁沈著誠

不易得泰定二年四月乙丑望日京口郭昇曾觀同郡張監共集

李西臺書與林和靖絕相類涪翁評之謂西臺傷肥和靖傷瘦和靖清枯之士也瘦之傷爲不誣西臺之書類其爲人典重溫潤何肥之傷也哉莒溪唐氏易安室所藏凡六帖觀者自能評之當以余言爲然時至正二十五年夏六月朔會稽抱遺老人楊維禎在雲間草玄閣試老陸鐵穎書

古人書法魏有鍾元常晉有王逸少唐則歐虞顏柳前後相望今觀諸家之書皆瀟灑出塵應規入矩中間柳氏顏氏雖有肥濁瘦硬不同皆各得字之精妙有未易以聲音笑貌及之也下此則宋西臺李建中其書法盡得古人之精妙故能風軌魏晉掃滌塵俗得其一點一

畫者皆可寶玩而况全簡累字如此君子能珍藏之庶  
李氏之書不朽矣金華姜月隱

自憶西臺筆法精良宵長使夢魂驚燕酣展卷晴窗下  
秋露春雲酒欲醒文江蕭引高

太古先生與予俱客江寧雖居相密邇而足迹頗疎爲  
恨耳祕閣晚出几格間西臺李公墨蹟乃云千里之地  
不能交一談而開胸臆思覲之深也如此今昔不同交  
誼何異其書法則與嶽麓寺相似間有一二行草可謂  
絕今超古者也宜寶之制河王尹實跋

唐人書法自徐浩來已駸駸入於宋矣至蘇黃始一大  
變而無復唐意今觀李西臺書雖在宋人當去唐爲不  
遠前論謂其有李北海之風是爲知言矣金華高士陳  
君大有得寶此帖間出相示觀畢謹識時戊子歲五月

一日也獨山王偁書

余昔景慕前翰林中舍王公尹實檢討王偁蕭引高王門教授同郡姜且皆以文章顯著其二王公特以篆草鳴於時今予辱廁朝列而諸公已相繼物故不復見矣余雖後生齒亦衰憊閒居每有興感茲偶獲觀諸公題李西臺之遺墨辭翰灑然宛如昨日噫西臺在宋時書能見重於今之世若使吾諸公片紙隻字垂數百年之久亦如今之取重西臺之蹟無異也世豈乏人哉三復展觀不能釋手遂識以歲月云時正統七年八月中秋後二日國子祭酒致仕金華貝泰題

儒

鍾王書法久寥寞羣議紛紛迷後學西臺遺蹟世應稀見此令人重驚愕文江劉日升拜手

李諫議銅魚詩帖

公名宗諤字昌武深州人宰相昉次子第進士曉音律判太常審定樂器奏斥謬濫汾陰禮成拜右諫議大夫真宗方期大用而公卒矣年四十九風流儒雅藏書萬卷能以聲名自立不墜門閥工隸書有文集六十卷此白紙本高一尺闊九寸一分行楷大七分許計七行

詩送士龍腹兄從表弟翰林學士李宗諤上

銅魚四明守竹馬十年兄摻袂河梁別鳴橈澤國行登樓知日近傍海見潮生郡政應多暇新詩幾首成



孫樞副鈐轄帖

沔字元規會稽人中進士第歷知處州楚州所在著  
能迹爲左正言論事有直名累官禮部侍郎致仕英  
宗卽位起爲資政殿學士知河中府徙延州道卒此  
札白羅紙粉箋高七寸五分闊一尺四寸書十四行  
沔啓近鈐轄范左藏赴任次有書必已呈達左右伏見賢  
郎掌坐具審尊候萬福及貴眷平安兼言曾侍朝旆至資  
慶祭奠墳山無任感涕前書敘謝已及意甚幸之沔衰老  
之態日增日昏齒脫減食乏力固已龍鍾矣欲到越而未  
能也未卜瞻對徒切企望謹奉此上惟冀善愛不宣沔再  
拜 通判屯田執事

宋宣獻度支帖

公名綬字公垂趙州人大中祥符初試學士院爲集  
賢校理與父臯同職累拜參知政事卒謚宣獻藏書  
萬餘卷親自校讎筆札尤精妙帝嘗取其書藏寘禁  
中子敏求

綬頓首度支學士近奉宴言深慰勞客忽承手札曲示勤  
私貺及吳中碑本及藤帽茶奩傷費頗多不敢辭拒但增  
覲佩之至謹因來价輒奉片幅爲謝綬頓首 四日

鑑

宋龍圖雅卿帖

公名敏求字次道賜進士及第預修唐書爲編修官  
仕終龍圖閣直學士命修兩朝正史掌均國公牋奏  
元豐二年卒年六十一特贈禮部侍郎公宰相子家  
藏書三萬卷皆略誦習熟悉朝廷典故士大夫疑議  
必就正焉著書甚多學者多資之此札硬白紙本高  
九寸五分書十五行筆法溫厚清整有宋印三方

敏求再拜近疎上問起居下情瞻嚮專辱書佩荷厚意歲  
晏寒闕比日伏想台候康福關中鎮撫踰年治聲茂建卽  
膺顯用以舒賢業未款奉間倍冀持養欽頌欽頌敏求再  
拜 十四日謹啓 雅卿安撫知府諫議節下

李祕書賤息帖

公名瀆字長源洛陽人杜門不仕多聚詩畫所居木石幽勝王公日李公宗諤皆與世舊勸之仕不答真宗祀汾陰召不起遣使存問天禧中卒贈祕書郎此帖紙本高九寸闊一尺二寸行草十二行

瀆悚恐再啓賤息失教先生肯幸臨灑掃延几杖豈宜少緩而迺爾悠悠真罪人比來屬老親爲穿窬所擾尤更煎熬正擬揆日造請安海之召豈宜舍我以徇切願勿渝夙諾今日雖岑寂未填溝壑尙冀有以効區區也日得暇一紆顧幸甚幸甚瀆再拜

葉學士天休帖

公名清臣字道卿長洲人天聖二年對策擢進士第二累官翰林學士權三司使坐論賈昌朝罷知河陽軍卒贈諫議大夫公天姿英邁遇事敢行奏對無所屈數上書論天下事陳九議十要五利皆當世可行者有文集一百六十卷此札淡黃紙高八寸闊一尺五寸書十五行宋印三方元印二方

清臣啓近聞移鎮經走賀封行人未還又聆汶上之拜相次遞中及急足回繼獲榮問具承福履康裕行期淹速之詳郵亦非輕景德中丁監嘗當此選亦朝家方今之重寄讓官與錫理固宜然仍聞且至丹徒待報并因納壻相望三舍畏此簡書雖不及瞻望風色亦可頻詢動止謹專遣小吏奉書伏惟念悉清臣咨拜

天休資政十兄行府 七月廿七日

又遣幹帖

研花白粉箋高一尺闊一尺三寸餘行書十三行

清臣啓近遣一幹隨府伉持書并錄覽二書同詣鈴下計  
已呈露數日前追胥自彼還辱手教歲不我與忽焉隆夏  
言念出處光景載環夷險均之政如宿昔天休蹈道深篤  
報上忠純樂職裕人無有內外顧爲簡書所縛不得車騎  
相過此可恨耳生拙守退伏蓋族尸淪閒齋晝眠後池晚  
飲惟性所適頗無羈牽長社櫟之扶疎同海鷗之放逸故  
人不爲念也清臣頓首 五月十八日

又大旆帖

白紙本高九寸四分闊一尺四寸行書大五分十三  
行

清臣啓近追大旆久侍緒言乍此睽分伏惟企戀伏承已  
涓良日據案署事東南千里蒙福此雖僻陋小邦日企餘  
潤甫憩棠蔭體中若何聽決餘閒善輔冲守不宣清臣再  
拜 七月五日上

資政大諫天休十兄防閣

林和靖二札卷

公名逋字君復錢塘人少孤力學性恬淡好古弗趨榮利結廬西湖之孤山二十年足不及城市真宗聞其名賜粟帛詔長吏勞問臨終有茂陵他日求遺藁猶喜曾無封禪書之句仁宗聞之嗟悼賜謚和靖先生公善行書喜爲詩不娶無子教兄子宥登進士甲科嘗識李諮爲公輔器至是諮守杭爲素服臨葬刻遺句納壙中此卷紙本共二幅每幅高九寸闊一尺餘質理厚有隱紋若雲行楷瘦勁氣骨清迥法書中之逸品也停雲館已刻石藏經箋引首李太僕貞伯題小篆三行

和靖處士真蹟

吳郡李應禎題

秋深帖



逋奉白秋深體履清適大師去後曾得信未院中諸事如常否今送到少許菱角容易容易謹此馳致不宣逋小簡上瑄兄坐主暫倩一人引此僕去章八郎家 廿二日

三君帖

逋奉簡三君數日前曾勞下訪屬以多故未果致謝感愧感愧榜名必已見了彼珍重者果爲兩手所指矣呵呵如因暇時許相過否馳此不宣從表林逋頓首四月十七日所託買物錢二索省是前人留下尙恐不足餘俟面致多感

此和靖真蹟聶衛公帥蜀時所得也觀其筆勢遒勁無一點塵俗氣與暗香疎影之句標致不殊此老胸中深有得梅之清故其發之文墨者類如此當襲藏之以爲珍玩元統甲戌夏五謝升孫書于南窗

成化乙未三月望日頎過沈君啓南有竹之居其子鴻  
出示和靖先生手書二簡拭目拜觀儼如緩步六橋艤  
寒香於冰雪之中而塵俗俱遣矣遂不揣庸陋援筆綴  
此於後鴻于展玩之際尙求先生之高風于翰墨之外  
可也陳頎識

去林處士殆五百年區區遺墨數行使人保護宛然如  
新彼人品庸下者雖伐山石大書而深刻之固有踣之  
者矣成化戊戌二月十六日因觀沈啓南所藏二小簡  
題吳寬

我愛翁書得瘦硬雲腴濯盡西湖淥西臺少肉是真評  
數行清瑩含冰玉宛然風節溢其間此字此翁真絕俗  
開緘見字卽見翁五百年來如轉燭可憐人物兩相求  
落我掌中珠有足水邊孤墳我曾拜土冷烟荒骨難肉

當時州吏歲勞問於今祀典誰登錄翁固不能知我悲  
聊對湖山歌楚曲我歌湖山亦不知惟有春鳩叫深竹  
歸來把酒弔雙緘猶勝無錢對黃菊 數年前予與劉  
完菴史明古遊杭首謁林和靖處士墓弔之至今高風  
清節猶想見于湖山而不忘也近讀東坡先生題處士  
詩高妙絕塵誠寡和之曲特借其韻爲作一首書於所  
藏處士二手帖後以志仰止之意成化丙申中秋日長  
洲沈周

西湖處士林君復結廬倒臥湖波淥百年何物傷汝廉  
山下梅花總寒玉滿城屋瓦鱗鱗然未信誰人能脫俗  
紫陌嬉春拾翠鈿歌鐘入夜燒紅燭獨教老鶴閒應門  
走傍湖陰濯雙足高平范公遣使來寄以新詩勝鮑肉  
風節文章厚且淳兩句平生誠實錄才多墨妙更入神

唯許唐翁和高曲果然遺墨似其人如倚清風捫瘦竹  
惜哉甫里陸天隨不趁斯文書杞菊 予旣題林處士  
遺墨見啓南高作在卷中輒復次韻

湖亭路繞梅花曲石硯年年洗芳淥湖光照眼花絕塵  
此老當時面如玉詩應獨步難同調字豈必工終不俗  
城東蒼頭持卷來一夜起看三秉燭我從書法得相法  
骨瘦神清臞亦足有如辛苦學仙人火冷空山斷葷肉  
遺編舊事已陳迹五百年來登鬼錄水流花落兩無情  
誰能更和西湖曲石田詩人亦清士居不種梅翻種竹  
他時併作隱君論何似周蓮與陶菊 觀沈石田所藏  
和靖先生真蹟及與吳匏菴追和坡韻之作敬賦此篇  
首曲字乃坡本韻所謂二義重押者也成化庚子五月  
乙巳長沙李東陽書于懷麓堂

我昔孤山訪遺躅春暖西湖泛晴綠山頭草樹不荒涼  
知是先生此埋玉念初茅廬結構完長吏頻顧驚流俗  
就中薛李最忘形湖上夜歸曾秉燭先生自樂味道腴  
此懷何嘗忘不足惟耽吟詠苦憂吟役擾心兵削肌肉  
詩成又復恐驚世輒毀不使相謗錄誰知造物難盡藏  
千古騷壇傳妙曲亦有遺墨落人間留在剡藤并楚竹  
見書瘦硬想其人似對靈均餒落菊曩過啓南見此  
卷謬題其上今復見之則啓南次蘇長公詩韻而吳李  
二內翰繼之不能不使人技癢也故又續貂于後啓南  
尙于冰霰之餘暗香疎影之下次第而歌之先生有靈  
盍不泠然御風來聽耶顧志

乾坤悠悠書兩幅墨光深照西湖綠人間翻覆等浮雲  
此紙完全如璧玉少陵瘦硬真入評右軍姿媚宜云俗

想當援筆對梅花誰用官奴寒把燭自然心畫得天妙  
一字百金酬不足乃知形貌列仙臞石帶烟霞山少肉  
巍巍氣節高百世奚假文章身後錄東坡去後古祠荒  
月下不聞迎送曲遺跡君家豈偶然天遣清風激修竹  
憑君開卷望孤山三灌薔薇咀秋菊

張淵

咸平處士骨已槁尺素誰傳雙鯉魚寶藏尙有安撫印  
遺稿原無封禪書人清併遣烏亦好字勁宛得梅之餘  
東風古寺揩倦目想像西湖雲水居石田沈君請飲  
寶幢教院書和靖帖見示因賦此詩手癢未愈寫作皆  
不工真疥此卷矣宏治癸丑二月廿六日程敏政識

韓魏公二帖卷

公名琦字稚圭相州人弱冠舉進士方唱名奏曰下  
五色雲見益利饑爲安撫使活饑民百九十萬蜀歸  
論西師形勢甚悉命往經略公與范公典兵久天下  
稱爲韓范元昊臣拜樞密副使尋避讒請外知揚鄆  
定嘉祐初迎拜樞密使三年平章政事至和中帝弗  
豫皇儲未定中外惴恐公乘間密啓贊立英宗及卽  
位有以定策爲言者正色謝止太后撤簾還政封魏  
國公神宗立拜司空兼侍中荆公執政議齟齬求判  
相州八年換節永興軍未拜薨年六十八前一夕有  
大星隕治樞馬皆驚贈尚書令諡忠獻兩札並牙色  
紙本高九寸闊一尺六寸正書結體大如圍棋子前  
乞歐公作畫錦堂記後則敘謝也筆法絕類平原

小懇帖

琦再拜啓琦有小懇容易干聒台聽琦向者自并易相事  
簡公暇因闢後圃起一堂名曰晝錦蓋取古人榮守本邦  
之義時杜正獻公以降往往有詩以光賁之已而被召歸  
闕常欲求公文百十字以記之爲鄴中不朽之事拜接幾  
十年卒蓄縮不敢措一語今守相趙元甫知琦欲有求于  
公遂能用心獲一美石磨礪已就且有書見督云早丐公  
文至則便可鐫立琦以此不自量度輒以誠請公若憐而  
許之不獨夸耀閭里誠獲託公文遂爲無窮之傳矣如曰  
未可幸恕妄作皇恐皇恐謹奉手啓上聞不宣琦再拜啓

敘謝帖

琦再拜啓信宿不奉儀色恭惟興寢百順琦前者輒以晝  
錦堂記容易上千退而自謂眇末之事不當仰煩大筆方



夙夜愧悔若無所處而公遽以記文爲示雄辭濬發譬夫江河之決奔騰放肆勢不可禦從而視者徒聳駭奪魄烏能測其淺深哉但褒假太過非愚不肖之所勝遂傳布之大恐爲君子之玷此又捧讀慚懼而不能自安也其在感著未易言悉謹奉手啓敘謝不宣琦再拜啓

參政侍郎台坐

張敬夫嘗言平生所見王荊公書皆如大忙中寫不知公安得有如許忙事此雖戲言然實切中其病今觀此卷因省平日得見韓公書蹟雖與親戚卑幼亦皆端嚴謹重略與此同未嘗一筆作行草勢蓋其胸中安靜詳密從容和豫故無頃刻忙時亦無纖芥忙意與荊公之躁擾急迫正相反也書札細事而於人德性其相關有如此者熹於是竊有警焉因識其語於左方慶元丁巳

大 鶴 錢 卷四

十月庚辰朱熹

十四 州 答 車

王文公湖北札

珪字禹玉成都人徙舒登進士甲科嘉祐中立皇子  
命草詔請對而後草歐公歎爲真學士元豐中拜門  
下侍郎定策立哲宗封岐國公薨年六十七謚曰文  
此札白粉紙本高八寸闊一尺三寸書六行有朱印  
珪啓汗後下血不已其勢殊可怪然今已小愈矣過賜存  
誨不勝感激朝夕馳見且復手啓不宣珪再拜  
湖北運使郎中坐前 初二日

孫侍讀子溫帖

公名甫字之翰陽翟人進士及第杜祁公薦爲祕閣校理應詔陳十二事名三聖正範改右正言歷官至河北都轉運使留爲侍讀卒贈諫議大夫此札白紙高八寸三分闊一尺二寸行書大七分十一行

甫啓虞候還附手啓必已呈左右節級歸又辱啓誨承卽日體况休豫深以爲慰舟船極荷應副已差人申取亦欲完葺也有所教令時惠一音餘惟順時自重以俟迅擢不宣甫手啓 子溫運判屯田同年侍史三月廿六日謹空

富鄭公修建帖

公名弼字彥國河南人舉茂才異等慶厯二年奉使契丹往復論辯不屈厯拜學士樞密力辭帝使宰相諭意乃受時命范公主西事公主北事尋帥青州振饑爲天下法至和中拜中書與潞公並命朝士相慶遭喪去位英宗立召還判揚州封鄭國公熙寧初入覲肩輿上殿坐訪治道足疾求退判汝州懇辭歸洛六年薨年八十謚文忠配享廟廷此札紙本高八寸闊一尺四寸行書十四行有收藏印五方

弼修建墳院得額已久先人神刻理當崇立今天下文章惟君謨與永叔主之又生平最相知者永叔方執政不欲干請獨有意于君謨久矣但爲編次文字未就故且遷延昨因示諭輒敢預聞下執卽非發於偶然惟故人倫察少

大觀錄卷四

共怡寄軒

安於下情也皇恐皇恐院榜候別書聞後圓覺偈亦如教  
刊摸也哀感何勝何勝弼又上溫柑絕新新盡薦于几筵  
悲感悲感弼又啓

文潞公祠部帖

公名彥博字寬夫汾州人登進士第轉運河東復銀  
城河便諸粟元昊來寇知有備解去貝州王則反久  
不克公往平之拜中書門下平章事尋出外至和中  
復召拜與富公並命朝野懽賀帝暴疾公留宿殿廡  
宮禁肅然命判河南府封潞國公英宗立以建儲前  
勞加侍中公任將相五十年名聞四裔紹聖初薨年  
九十二謚忠烈此帖紙本高八寸闊一尺餘行書大  
寸許十行筆法剛勁有骨力

彥博頓首祠部同年近累得來翰深荷勤意審美轉伏惟  
歡會未涯披對春中萬萬愛重彥博頓首 靜萬已至且  
令模書必應過夏

范文正公與尹師魯二札卷

牙色綿紙本二札俱一尺高前札闊一尺七寸後札  
闊一尺三寸行草書大如指頂用筆殊率意不甚工  
然諸跋最精樓洪二跋字大於古錢楊跋端楷似率  
更泰不華尤絕少名蹟騎縫有舛州諸印

仲淹啓熱中得回問知漢東尤甚然西洛上京皆苦熱宣  
下開井救暍者此可知矣三兩日來因雨微涼彼亦然矣  
折支已差人許州般取到卽走報不易不易請見錢者猶  
煎熬不足蓋日給外月月有橫費處家家如之邠酒四餅  
近寄來請收檢鄧醞已竭候新者送去合得花蛇散可日  
一服甚有功恐疑之和方寄上希多愛多愛不宣仲淹上  
師魯舍人左右 七月十四日

新牧舊識候到卽有書去兼是暮侶也先託伸意



大觀錄卷四

大怡寄軒

仲淹頓首李寺丞行承奉 削遞中亦領來教承勳止休  
勝仲淹此中無事 兒子病未得全愈亦漸退減田元均  
書來專送上近得 揚州書甚問師魯亦已報他貧且安  
也暑中且得未動爲佳惟君子爲能樂道正在此矣加愛  
加愛不宜仲淹上

師魯舍人左右 四月廿七日

師魯自均州輿疾至南陽託范公以死蓋平日之相與  
者如此四明樓鑰書紹熙三年十月晦日

范公二帖皆是師魯謫漢東時書後一帖却當在前或  
自均過鄧託范公以死時問訊之書與衆云云之戒可  
見也賢者困厄至此人到于今傷之藏之深固之密石  
可朽名不滅歐公銘文盡之矣洪邁書

方范文正與呂文靖爭論上前貶饒州時尹舍人實上

書願得俱貶監郢州酒稅此一卷帖情義諄諄不啻兄弟蓋二公愛君憂國道合志同其相與之厚自應爾爾淳熙己亥清明日梁溪尤袤謹觀

佳客千山得得來主人雙眼爲渠開逢人莫說當時事且泊南亭酒一杯  
右第二紙當是尹自均來訪范於南陽時也范戒尹以不須與衆云云此意最深淳熙戊申三月廿八日廬陵楊萬里敬書

范文正公以論事忤執政遂落職知饒州於時直范公者相屬於朝尹師魯亦自請同黜可以見一時賢才之盛矣師魯旣貶監郢州稅觀范公二書中語略不及當時事亦不以師魯因已被黜而加存問蓋范公所論爲國也而師魯之請以義也是豈有一毫私意於其間哉書末云惟君子爲能樂道前賢之用心於此可見矣二

帖筆力遒勁有晉人遺意尤非泛泛於書者范氏其世寶之至元三年丁丑歲秋九月望後學泰不華書

靜翁又近得此二帖乃文正公與尹師魯書也交情古誼百世之下尙可想見視他帖尤當珍愛學士大夫所願見而不可得者况尤樓洪楊四公之題識亦豈復可得哉賢子孫宜永保之至順四年五月五日後學東陽

胡助謹書

題

景祐二年公上論遷都事與呂文靖異議出知饒州秘書丞集賢校理余靖言加罪言者非太平之政坐落職監筠州酒稅而太子中允館閣校勘尹洙又言范某義兼師友乞從降黜亦坐貶崇信軍節度掌書記監郢州酒稅此二帖皆尹公在郢時所遺問若曰日給外月月有橫費家家如之至於收檢郃酒候送鄧醞合花蛇散

和方送上見朋友有救卹通財之義而惟君子樂道爲能盡之也其後公鎮鄧尹公再貶監均州酒稅與疾來鄧以存歿託公則公之與尹公可謂生死不易其諒矣然楊洪二公跋語以第二帖是自均來南陽時且有不須與衆云云之戒今帖中乃無此語然以動止休嘉及報他貧且安也等言證之則非疾時矣恐此跋非此帖也前帖鈐縫有王厚之順伯陰文十六字印知爲順伯所藏順伯臨川王和父之孫好古博物爲中興第一徽文公與之友善集中載其書問可考也田元均諱況蓋謚宣簡云東陽後學柳貫謹識

尹公自謂與范公義兼師友而其言談罕及于性命至尹公處死生之變尤人所難及非知道者不足以與於此蓋是時風俗醇厚士大夫不言而躬行未至立名字

以相高此宋三百年極盛之際也伏觀范公遺帖安得不爲之撫卷而三歎乎至正七年春正月甲子後學黃潛敬觀

范公與尹舍人往還書一卷當有與衆云云帖而逸之觀洪楊二公跋語可知也後人不見此帖乃改跋中三字作二字耳覽者當能辨之元統乙亥春三月壬寅新安後學汪澤民謹書

景祐四年文正公旣以言呂夷簡出知饒州尹公師魯亦貶監郢州酒稅慶厯四年尹爲涇原經略以爭城水洛事爲董士廉所訟再貶均州監稅時文正公在政府也踰年公出知邠州又改鄧州此二帖蓋在鄧與尹者夫以尹公之賢文正公於其生也通以書而盡其慰問之誠歐陽公又於其歿也爲之銘以致其痛惜之意好

賢樂善固如是哉至元四年後戊寅十有一月望後學  
鄭僖書

文正公與尹師魯帖詞翰俱不易得名公題跋又盡善  
愚何幸親見之成化辛丑六月廿日高唐劉魁拜識社  
尹師魯何如人而克致范文正公之敬愛若是耶余嘗  
考之師魯以靜退爲樂以古文矯俗其行高學古可知  
矣及觀文正黜知饒州師魯請同降黜其臣節友誼又  
可知矣其爲文正之所敬愛簡帖往還契之若金蘭而  
友之若兄弟也噫觀文正遺翰留芳千載一日師魯之  
名得與同垂不朽亦何幸哉成化辛丑秋八月八日句  
曲戴仁敬題

宋盛時有西夏之擾范公與尹師魯合謀戮力以抗之  
相得甚深蓋以道義事功爲友者也此二帖與師魯者

其一已刻文正尺牘中寬嘗閱之何幸今日復獲見真蹟哉然二帖不藏于尹氏顧歸於文正子孫則其後世之盛衰亦可知矣鄉後學吳寬謹書

范文正公與尹師魯舍人二札蓋家人寒暄語耳未幾而爲師魯經紀身後志其遺行至今爲士林所稱則君臣父子朋友之道此實基之故不當以書家論也跋者如宋洪文敏邁之博學樓宣獻鑰楊文節萬里明吳文定寬之學行元柳待制貫黃文獻潛之詞藝汪文節澤民泰不花忠介之死節皆卓然名搢紳與二公風猷節概固有相感異代者敬爲識之考胡古愚跋稱尤樓洪楊尤是文簡公表錫人也以祕監終得謚文簡豈潭池脫落時佚之耶萬歷乙卯秋日後學王世貞敬書

范忠宣日企帖

公名純仁字堯夫皇祐初進士第治平中議濮王典禮不聽家居待罪尋詔起神宗朝命條古今治亂作尚書解以進轉運成都戒州縣不得遽行新法荆公怒斥外哲宗立除給事中時司馬公執政公臨事規切進知樞密院三年拜僕射帝親政章惇入貶永州徽宗立乞歸許疾革口占遺表明宣仁太后誣謗熟寐卒年七十五謚忠宣此帖白紙本高九寸闊一尺二寸五分正書大四分計九行

念者日企軒馭之來以釋煩渴天氣斗寒必已倦出應且盤桓過冬况伯康初安諒難離去咫尺無由往見豈勝思仰之情更新以時倍加保重其他書不能盡純仁頓首上伯康君實二兄坐前 九月十一日



范侍郎故人帖

公名純粹字德孺以蔭累官至戶部侍郎紹聖中用  
事者欲開邊釁論公守慶時棄地事降直龍圖閣旋  
以黨人奪職徽宗立再起再黜黨禁解復徽猷閣待  
制卒年七十餘公沈毅有幹略才應時須論事多剴  
切無忝文正公忠宣子弟云此札白紙本高八寸八  
分闊一尺三寸行書大七分計九行

純粹啓久不見故人每以依仰東吳山水之國風物秀麗  
食飲佳嫩想全翁甚樂之也純粹守此五年矣比再滿才  
歲餘耳淺拙自力無足言者親老得此地涼疾體稍便二  
家兄到晉數得書三家兄且安職然去意常在也何當款  
語以舒遠情惟此可道純粹上

韓康公從事帖

公名絳字子華雍邱人中進士甲科歷官龍圖閣直  
學士知瀛州歐公率同列言公宜在朝廷因留知諫  
院神宗立韓魏公薦公有公輔器拜樞密副使代荆  
公爲相與惠卿議不協迨荆公入復齟齬求去元祐  
初封康國公謚獻肅此札白粉箋高八寸八分開一  
尺二寸行書大五分十三行騎縫鈐古印

絳頓首猥蒙訪別以未由陞見不及舟次敘違甚爲悚戀  
不勝懇懇乍遠談對切冀倍加愛重爲最走此陳謝匆匆  
不宜絳再拜 從事同年兄 十七日書一角錢十三千  
七十七陌牋紙二軸並託求使人致錢塘知縣舍弟太祝  
處容易干煩不勝愧仄愧仄

又冲師詩帖

白粉箋本高八寸一分闊八寸七分真書大七分計  
八行

絳偶成拙頌寄冲師長老潁川韓絳上

承師一指便心空萬象森羅觸處通別後自他知不隔漫  
漫積雪起寒風

韓太祝留守帖

繹忠獻第四子子華弟玉汝兄也名位不大顯此帖  
白紙高八寸七分闊一尺四寸餘楷書十三行

繹頓首再拜留守司徒侍中繹瞻懷館下馳情旦暮昨以  
承乏牽冗久疎左右之間悚忤至深冬仲嚴寒伏惟台候  
動止萬福區區嚮往末繇言侍仰冀保調寢味下情之望  
謹奉啓不宣繹皇恐啓上

留守司徒侍中台坐 十一月十一日謹空

韓中書欽聞帖

續字玉汝登進士第官至中書侍郎蔡確與章惇謀  
誣東朝公暴其姦狀由是東朝及外廷悉知之顧爲  
轉運使及典郡嚴酷秦民有乳虎之謠此札白粉箋  
高八寸二分闊八寸六分楷書大七分計五行

續欽聞制命深副願言屬此守藩莫遑修慶嚮風馳想言  
敘奚殫繹又上

趙清獻山藥帖

公名抃字閱道衢州人進士及第爲御史彈劾不避  
權倖京師有鐵面之目知成都以琴鶴自隨政尚簡  
易未幾參知政事上書極論新法懇去位復知成都  
政益寬簡蜀郡晏然徙越州救荒盡術尋致仕遍遊  
名山人以爲榮元豐間薨年七十七謚清獻此札白  
紙本高八寸闊七寸行楷大四分計七行

抃啓辱誨示以南都山藥分惠曷勝珍感介還布謝崖略  
不宣抃頓首

知郡公明大夫座前卽刻 海柑四十顆容易爲獻皇恐  
皇恐

張文定留錢塘帖

公名方平字安道南京人中茂材異等賢良方正知  
諫院時西師未解願因郊赦引咎示信元昊竟降拜  
三司使請降手詔罷權河北鹽父老皆迎拜于澶知  
益州定扇亂蜀賴以安英宗弗豫公卽爲承旨召草  
詔抗議立穎王卽神宗也拜參知政事憂去服闋知  
陳州極論新法之害判應天府闕伯微子廟得不齋  
公真回天力也元祐初加太子太保五年薨年八十  
有五謚文定此札紙本高七寸三分闊九寸七分  
行書六行

賢郎在侍下留錢塘也今有疏慰告爲附達寵惠名茶不  
任愧感愧感中間示諭新製火爐告令買兩所因便寄及  
爲幸方平啓

沈學士屯田帖

公名邁字文通錢塘人舉進士通判江寧歸上本治  
論仁宗數爲可用尋知制誥以事出知杭州明于吏  
治令行禁止遷翰林學士母喪歸廬墓卒年四十此  
札白紙高八寸二分闊九寸餘行書大七分九行

屯田君士林之英方當進用於朝遽茲棄化衆所嘆也友  
于之情奈何奈何孔子稱仁者壽仁者不以年也謂聖人  
達死生之理而若常存之爾明哲深珍是庶可不傷于性  
焉邁上

歐陽文忠上恩帖

公名修字永叔廬陵人擢進士甲科以文章冠天下  
慶厯中知諫院論事切直帝獎其敢言嘉祐間知貢  
舉一變場屋險怪之習知開封承包公威嚴之後簡  
易爲治久之參知政事仁宗崩與韓公協議立英宗  
熙寧初被汙求退知亳州青州五年卒謚文忠此札  
紙本高七寸八分闊一尺五寸餘大行楷十六行

修啓修以衰病餘生蒙上恩寬假哀其懇至俾遂歸老自  
杜門里巷與世日疎惟竊自念幸得早從當世賢者之游  
其於欽嚮德義未始少忘于心耳近張寺丞自洛來出所  
惠書其爲感慰何可勝言因得仰詔起居喜承晏處優閒  
履况清福春候暄和更冀爲時愛重以副搢紳所以有望  
者非獨田畝垂盡之人區區也不宜修再拜三月初二日



大觀錄卷四

端明侍讀留臺執事

王怡寄軒

曾舍人局事帖

公名鞏字子固南豐人爲文章原本六經仁宗朝登  
進士第通判越州罷鄉戶賦貸粟振飢有法知齊州  
以疾姦急盜爲治連知福州亳州滄州神宗時過闕  
留判三班院加修撰專典國史尋拜中書舍人掌牋  
奏母艱去卒年六十五此東宋書紙背作高八寸餘  
闊一尺二寸書十三行鞏字大逾六分尾押方印

局事多暇動履禔福去遠誨諭之益忽忽三載之久跼處  
窮微日迷汨于吏職之冗固豈有樂意耶去受代之期雖  
幸密邇而替人寂然未聞亦旦夕望望果能遂逃曠弛實  
自賢者之力夏秋之交道出府下因以致謝左右庶竟萬  
一餘冀順序珍重前卽召擢偶便專此上問不宣鞏再拜  
運勾奉議無黨鄉賢 二十七日謹啓

曾學士益友帖

公名肇字子開舉進士元祐初擢中書舍人尋出外  
徽宗立時以恩赦甄敘元祐臣寮公請并錄死者訓  
詞哀厚讀者感愴遷翰林學士崇寧初落職四年卒  
兄布爲相公移書當引用善人扶正道以杜惇卞復  
起之萌布不能從卒敗此札牙色箋高八寸四分闊  
一尺四寸七分行書大八分十六行

肇奉別行復歲暮傾嚮實倍常情但公私紛紛爲問不數  
甚自愧也別紙丁寧豈惟益友忠告之誼亦出于憂國懇  
懇之誠反復數四不勝感歎衰拙于此豈能翹然偶再三  
則讀終恐無補爾餘非會面不究所懷遠書萬一流落不  
可不慮也海陵過此相見誠如所諭所諭廣陵之傳迺邸  
吏誤報乘流得坎任其自然未嘗以此爲念上下匱乏所

在皆爾非獨彼也歲晚益寒強食自愛爲祝聲又上

曾樞密嚮往帖

布字子宣幼孤學于兄輩同登第附荆舒創新法驟見拔用尋觸怒去位紹聖初拜知樞密院崇寧初出知潤州坐贓賄落職卒年七十二謚文肅此札米色硬紙高八寸闊一尺五寸書十三行宋印二小方

布久別浸深嚮往昨承易郡尋復就職閑館方悲苦之初久矣馳問存照之素宜未知加誚邇來諸况何如京口頗便安否屈伸有命唯賢者能以理安但士論滋以爲鬱爾然不逞之人亦終不免則進退出處益可以知其非人力也諸所欲言非書可悉非久獲申前請則會晤有期矣區區非面展莫罄萬一布又啓

又知府帖

白粉箋高九寸闊一尺三寸四分行書大七分計十

三行

布頓首再拜布區區承乏守邊辱在鄰壤輝光潤澤之所  
霑被得以庇藏蹇拙所蒙固已多矣而撫循勞問眷與之  
渥愈久益隆孤朽之姿何以堪此佩服恩紀愧載而已登  
候略具前紙不敢重陳悃悃之私臨紙莫罄萬一伏惟幸  
察謹奉手啓不宣布頓首再拜上

知府安撫資政左丞台坐 十八日謹空

又質夫帖

白紙本高八寸二分闊一尺一寸四分大行楷十行  
布頓首還朝雖久未獲一接緒論傾企不忘比蒙枉顧不  
遺豈勝感慰秋意加爽切惟優游圖史之間諸况甚適拘  
文無緣造謁但增嚮往謹奉啓敘謝不宣布手啓上  
質夫學士侍史

王懿敏陟右帖

公名素字仲儀太尉曰季子也賜進士出身仁宗擢  
知諫院方壯年遇事感發言人所難言歷守外郡再  
尹開封熙寧中以學士就第卒年六十七謚懿敏此  
札紙本高九寸闊九寸五分書八行

素再拜啓陟右久藉才德宣布天子之惠一方安肅實解  
朝廷西顧之憂然偶淹使麾輿議甚鬱想進用之命不出  
旦夕伏冀寬以處之前迓寵數少慰門人之望幸甚幸甚  
素再行

錢待制公默帖

公名公輔字君倚武進人第進士歷官知制誥英宗  
卽位陳治平十議帝問一篇上之尋以不草王疇制  
謫滁州團練使神宗立召拜天章閣待制知諫院復  
以救滕甫黜薛向拂安石意出知江寧帝欲召還安  
石沮之提舉崇福觀卒年五十二此札牙色紙高八  
寸闊一尺二寸行書十五行大八分許

公輔啓別久問稀日遲還轅之來得元珍書乃知憂禍歸  
於故里榮養未幾不遂雅志痛當奈何奈何冬序已晚不  
審孝履何若未由面慰惟冀節哀以力大事遠情所祝不  
宣公輔手啓 公默祕校大孝服舍 張微之同此哀苦  
料日得相依足以自寬季冬初七日



司馬溫公題跋帖

公名光字君實夏縣人寶元初進士甲科歷事仁英神哲四朝熙寧中請歸洛卽家修資治通鑑成特進資政殿學士居洛十五年天下以爲真宰相神宗崩哲宗幼冲宣仁太后臨政起爲門下侍郎首罷保甲團教之厲民者拜尚書左僕射又罷青苗錢復常平糴糴法兩宮虛己以聽遼夏戒其邊吏無生事開邊隙公銳意興治病亟薨年六十八贈太師溫國公謚文正立碑賜葬紹聖中黨論起奪謚仆碑追貶欽宗初還謚建炎中配享廟庭帖白紙本高八寸闊一尺七寸正書大逾指頂十七行端莊沈毅石湖所謂開卷儼然使人邪僻之心都盡者也但此蹟在陳亞之詩卷中不知何緣割出配入北宋諸賢詩翰也

天聖中先太尉與故相國龐公同爲羣牧判官故省副陳公與龐公善光以孺子得拜陳公于榻下元豐二年八月乙丑晦陳公之孫法曹過洛以公手書詩稿相示追計五十年矣嗚呼人生如寄其才志之美所以能不朽于後者賴遺文耳苟無賢子孫其湮沒不顯于世可勝道哉光竊自悲侍公之久今日乃得睹公之文又喜法曹君之賢能顯融其先烈是敢嗣書于羣賢之末涑水司馬光

兩淮帖

光再覆伏自兵興兩淮幾爲棄地朝廷雖欲漸謀經理而兵食闕然未易倉卒辦也餘俟後訊詳具伏乞照知光再拜

又陳謝帖

右伏蒙尊慈特有頒賜感佩之至但積下情謹奉狀陳謝

伏惟照察謹狀

月日具位

大觀錄卷四

王怡寄軒

范學士公休帖

公名祖禹字滄甫中進士甲科元祐中拜翰林學士  
哲宗親政方欲大用會紹述之論興有相章惇意力  
請外以龍圖閣學士知陝州尋爲言者論貶卒年五  
十八公長於勸講平生論諫不啻數十萬言開陳治  
道分別邪正平易明白雖賈陸不能過也此札紙本  
高九寸闊一尺六寸書四行押宋印三方

趙待制適聞在陳少卿宅安下承見報甚荷李曹來日參  
陪往迎接先狀續納去告令人同下也祖禹拜上 公休

## 錢學士起居帖

公名勣字穆父以蔭知尉氏縣召對安石許用爲御史以家貧母老辭奉使高麗力却餽餉還拜中書舍人元祐初知開封府械治干請貴戚斂手積爲衆所憾出知瀛州再知開封臨事益精哲宗親政擢翰林學士兼侍讀章惇排詆不已罷知池州卒此帖白紙高九寸八分闊七寸五分行書四行得大令法

先起居贈開府儀同三司司空一帖先叔父修懿尙書儀同十八帖已上元祐庚午十二月知軍州事勣因移高陽安撫使辭墳遂命裝褫付沈氏以防遺墜云

## 又知郡帖

牙色紙高八寸餘闊一尺三寸行書十三行

勣頓首祗啓知郡工部鈴下末夏毒暑伏惟燕居之餘尊

候萬福颺鄙鈍無狀誤被台札卽日遂西無由一詣門館  
攀違下情依戀之至謹奉啓聞伏惟炤管不宣颺再拜  
知郡工部鈐下 六月九日謹空

呂肅穆子安帖

公名公弼字寶臣相夷簡子賜進士官至樞密使奏  
請勿并鄜延環慶爲一路使緩急難應又奏勿復肉  
刑荆舒創新法數面爭且將疏奏其從孫嘉問竊葉  
示荆舒預白帝遂出知太原時急秦鳳帥命公判秦  
尋以疾求解爲西太一宮使薨年六十七謚肅穆此  
札牙色紙高七寸八分闊八寸三分行書六行

子安學問博瞻材智深遠豈能久困常選方朝廷搜揚俊  
異用特立之士何必借譽平常之流公弼再拜

大觀錄卷四

書怡寄軒

章學士承示帖

公名衡字子平浦城人嘉祐二年進士第一歷知汝  
潁二州還判太常寺使遼燕射連發破的遼待之異  
於他使拜寶文閣待制知澶州寶文藏仁宗御集處  
以公爲嘉祐魁選因以命也元祐中歷秀襄河陽曹  
蘇等州知學士復知揚廬宣穎卒年七十五此札紙  
本高七寸七分闊八寸六分行書九行

承示諭張恢者邇以胡公昆玉世契之厚待之以禮不謂  
全不循理切恐仰玷盛德然亦欲小警大戒可以完其出  
處諒惟深察公文如命頒下縣鎮矣衡悚息



唐中允征局帖

炯以父任得官熙寧初上言青苗法不行當斬大臣  
異議如韓琦者數人安石喜薦對賜進士出身帝薄  
其人除知錢塘縣安石留之將用爲諫官疑其輕脫  
背己不除職炯果怒疏安石罪六十條上殿宣讀安  
石爲之請去閣門糾其瀆亂朝儀貶卒此札白箋高  
八寸闊一尺一寸四分行書半寸大六分

炯啓征局冗座忽辱珍翰意快目明殊增欣感昨日紙再  
納一番朝夕躬請左右次不宣炯再拜

彥遠尊兄侍史 午刻

蒲右丞夏中帖

宗孟字傳正閬州人第進士召爲集賢校理呂惠卿制手實法猶以災傷不預宗孟并請勿以豐凶弛張民病益甚拜尚書左丞誣奏人才爲司馬邪說所壞帝薄之御史尋論其荒于酒色出外再以慘酷劾奪職明年還職帥永興移大名卒年六十六此札白粉箋高九寸闊一尺一寸五分行楷大七分九行

宗孟頓首夏中蒲兵還辱榮翰遙懷德誼無時暫忘秋高氣清想惟邇日視履均勝南北遼邈江河阻修引領話言實勞鑒寐初寒惟冀倍萬珍衛手削草率不宣宗孟頓首知府鈐轄子中待制 十二日

王宗丞方面帖

公名鞏字定國丞相日孫有雋才長於詩尤工書法  
從蘇文忠游吹笛飲酒乘月黃樓文忠得罪公亦竄  
賓州數歲還厯宗正丞跌蕩傲世宦終不遂此札紙  
本高九寸闊一尺五寸書九行宋印三方

鞏啓疲病不支每過郡邑先自怵惕竟蒙長者先屈降車  
旆雖懷德深矣而愧罪何言朝夕一趨門下以究鄙誠匪  
懈之愚伏覲亮察謹奉狀 十月丁亥鞏頓首再拜  
又冷淘帖

紙本高七寸四分闊九寸四分字半寸大六行

鞏已作冷淘一杯幸何如也區區所敘承惠團餅珍感之  
至有翰示之聊陳謝誠無煩枉書爲報鞏再拜

王學士觀察帖

廣淵字才叔大名人慶厯中舉進士英宗居藩邸見  
昵及卽位累用爲羣牧判官諫臣言弗聽也嘗命書  
洪範于欽明殿屏神宗立出外奏貸息錢迎合荆公  
意復遷擢仕終龍圖閣直學士知渭州卒年六十

廣淵惶恐昨日承台軒降過適領手誨併深感悚表章奏  
狀文字已精當謹却封納廣淵稽首 觀察太尉一日

王右丞朝散帖

公名安禮字和甫介甫弟早登甲科直舍人院蘇文忠下臺獄公力救卒得輕比尹開封決事稱神明元豐中拜尚書右丞紹聖二年知太原府卒年六十二此札紙本高九寸闊一尺五寸書七行宋印五方安禮啓辱手示承動止清勝深以感喜赴官何日便道冀一見方暑未閒自愛不宣安禮啓上 通判朝散陳公

李商老公關帖

彭字商老自謂其書法右軍之贍麗用魯公之筆格  
獵奇峭于誠懸體韻度于凝式而山谷亦謂其字有  
鍾王之風固專精六法以書名家者也此帖紙本高  
八寸七分闊一尺二寸五分行草大六分十一行

公關家兄得彼相從當甚歡也然亦以親老思北歸何時  
遂耶小妹子與諸孤幸此糊口粗安勿煩爲念但念八已  
長成未有親三十已許與小子房 第十二子爲婚須候  
念八了當方議之也令嗣去年相見或云未出京久不訪  
及諒當專令人來娵所耳別紙示諭備悉來諭敢不在下  
懷耶未閒千萬珍重彭頓首

劉無言侍坐帖

燾字無言溫陵人以草書名世山谷續法帖云燾書不類古人或以江東羊欣目之此侍坐帖研花粉牋高八寸五分闊一尺行書九行牛尾帖紙本高八寸闊九寸七分行書四行

燾再拜昨夕幸得侍坐早來廷中瞻望顏色不款奉告伏審晚刻尊候萬裕改月自當至左右適自局至家親賓紛然逮今未定旦夕專得面拜使還不備燾再拜

五伯父大夫 伯母縣君坐前

又牛尾帖

燾惶悚野人送至牛尾輒庖治寄獻願恕輕浼幸甚幸甚再啓

大觀錄卷四

美怡寄軒

邵直閣到京帖

鑑字仲恭丹陽人官直龍圖閣知蘇州書工正行史  
無傳此帖紙本高七寸七分闊九寸字大六分九行  
饒啓到京俗事區區遂不果頻上狀嚮往何可言秋暑尙  
爾不審迹成公外動靜何如饒無狀承乏東排岸勉力祗  
職未緣聚會謹勒手啓候起居唯祈以時保衛不宣饒再  
拜 存道良親司理閣下



呂汲公尚書帖

公名大防字微仲京兆人進士及第知青城縣英宗  
立擢御史以爭濮王稱考議復出知休寧熙豐間知  
秦州徙永興時用兵西夏調度恤民元祐初召拜中  
書侍郎封汲郡公尋進僕射紹聖中貶循州至虔薨  
年七十一士論冤之高宗追謚正愍此札白紙本高  
八寸三分闊八寸四分行楷書六行大七分

大防頓首私門不幸息女喪亡伏蒙台慈特賜手問仰荷  
軫恤無任悲感未由面謝哀咽奉啓不次 大防頓首  
尚書右丞台坐

蘇僕射守郡帖

公名頌字子容丹陽人第進士知江寧縣定丁產剋  
蠹成賦簡而易行旁邑視以爲法元祐中累拜右僕  
射中書門下侍郎紹聖四年致仕徽宗立封趙郡公  
二年卒年八十二公器局宏遠以禮法自持書契以  
來經史九流無所不通尤明典故大制作必就正焉  
此札紙本高九寸闊一尺餘書十一行宋印三方  
頌惶恐再拜頌守郡亡狀日懼謹呵依賴陶鈞得以逸過  
非因歲序不敢自通左右上煩聽覽萬萬之懇何以寄言  
卽日蒙恩竊病如昨瞻嚮門館恨乏羽翰惟以孤危仰  
謁明哲伏惟鈞慈矜念下情愧恐之至頌再拜

王樞密慶牋帖

公名巖叟字彥霖大名人年十八鄉舉省試廷對俱第一哲宗立擢御史入臺卽上疏論社稷安危罷斥惇確元祐中拜樞密直學士以救劉摯去位知河陽軍卒年五十一紹聖初坐元祐黨追貶司馬公以其進諫無隱稱之此札白硬紙本高八寸闊一尺五寸書八行宋印三方

巖叟再啓鄙陋自忝命得慶牋以百數事典而韻清辭工而意足未有如崧老之文者雖褒揚資飾假借所不當而嘆賞珍藏其有已哉巖叟又上

趙郡王蒙餉帖

令時字德麟燕懿王孫也元祐六年蘇文忠守穎德  
麟爲簽書公事愛其才薦于朝坐交通罰金紹興中  
襲封安定郡王薨貧無以爲殮工草書筆道而法足  
此札牙色紙本高八寸五分闊一尺三寸行書九行  
令時頓首辱惠翰伏承久雨起居佳勝蒙餉梨栗愧荷比  
拜上恩賜茶分一餅可奉尊堂餘冀爲時自愛不宣令時  
頓首 仲儀兵曹宣教 八月廿七日

林副樞風範帖

希字子中福州人舉進士元祐初進中書舍人言者  
疏其行詣浮僞士論浮薄不足玷從列會哲宗親政  
章惇用事使希典書命惇毒于元祐諸臣希甘心焉  
紹述議起希皆密與擢副樞密惇布交構布誘希畔  
惇遂罷出外徽宗時奪職卒後謚文節此札白紙本  
高八寸闊一尺二寸行書大六分十四行

希再拜前此四年嘗於武林奉見風範然一往來之間未  
及深接嘉誼而心所傾嚮固亦異于此矣乖隔以來不審  
侍下福履何似希閒居吳門相望才數舍未緣前見徒積  
瞻跂輒奉手狀通問幸恕崖略不宣長樂林希再拜

劉君祕書文几

二月十三日手狀

又完夫帖

大觀錄

卷四

至怡寄軒

白紙本高七寸八分開一尺一寸餘行書計十行

希啓前日辱屈臨感刻感刻歸聖兄弟並入開寶睿遂當  
獨牒奈何天清一室速治之開寶舍亦望令人諭主僧且  
那與小子處并一二親情同處也恐見令姪般出便據之  
也兼舉子紛然不可不先慮之也阻于面奉先此布一二  
希頓首 完夫府判朝奉學士兄 十四日

蔣樞密辱書帖

之奇字穎叔宜興人進士第擢御史神宗時爲淮東  
轉運使修水利溉田活民以數萬計知熙州夏人不  
敢犯塞徽宗立知樞密院崇寧元年出知杭州尋以  
棄河湟奪職三年卒之奇數歷中外以治辦稱特以  
畔歐公爲清議所薄有小人目云此札白粉箋高  
七寸闊一尺二寸三分行書大五分計九行

之奇啓辱書承比來體履佳愈遠宦枹罕想難於行計也  
往使陝右乃所嘗到一味只有人與兵馬便可以習帥  
才也呵呵承國門嘗見訪非諭及則不知也方暄自愛自  
愛不宣之奇頓首 彥和河州司戶二月二十日  
又九兄帖

白紙本高八寸闊一尺二寸三分行書十一行

之奇啓知遂往法濟不勝依依長安酥二斤葱雀鮓兩罐  
水梨鳳棲梨各十枚山藥少許聊薦賓盤幸冀容納以鞠  
大獄不果拜違愴恨之懷不能勝述乍遠乞保重不備第  
之奇再拜 九兄知府郎中



呂侍郎蒙恩帖

嘉問字望之以蔭入官熙寧初提舉京城市易務帝聞其擾民間安石因令嘉問條析執以奏會曾布爲三司劾其多收息爲兼并出知常州紹聖初擢戶部侍郎知開封府專附惇卞多殺不辜徽宗時屢貶屢起卒年七十九此札白粉紙本高八寸五分闊一尺一寸七分行書十行大八分

嘉問衰晚無堪蒙恩進職易郡悉出交游延譽之賜將何補報有愧而已辱誨示副以慶函禮意之厚益重慚畏嘉問至青社累月乍脫東南之劇就一州之安良以爲幸但未知晤語之日馳情惓惓嘉問再拜

李朝請別紙帖

之儀字端叔滄州人登第三十年始從蘇文忠于定  
州幕元符中詔勒停徽宗初坐作范忠宣行狀編管  
太平工尺牘入刀筆三昧仕終朝請大夫此札牙色  
箋高九寸二分闊一尺二寸行書大六分十三行

之儀再啓伏讀別紙延譽加重深畏非據頃自稍遠一向  
杜門時到田畝間與邨老周旋外塊坐而已高誼素所景  
仰裹糧而趨固所欣願况近在數十里地耶便當撥置以  
圖傾盡不愚早晚可回聞其婦家已有代期何猶遷延也  
丁君聞好事鄙語書於質轉應副過煩獎予皇恐皇恐叔  
黨定肯書否果得之足以借重也乍到過從必未閒又一  
端若將遠別得無應接稍勞否之儀再啓

孔待制莘民帖

公名武仲字常父新喻人中進士甲科元祐初官司  
業詆王氏學請復詩賦取士歷遷寶文閣待制知洪  
州坐元祐黨奪職卒五十七所著有講義諸書此札  
硬黃紙高一尺闊一尺七寸書十五行宋印三方

武仲再拜莘民府曹承議尊兄拜違俯仰期年公私多故  
久缺修問嚮往友益拳拳未始少忘卽日秋氣澄肅恭惟  
燕居暇豫尊候動止休福武仲待罪無補不足爲左右道  
未緣晤對千萬以時保練別膺褒擢副此欣願謹奉啓上  
布不宣武仲頓首再拜

莘民府曹承議尊兄坐前 八月旦

陳忠肅嚴寒帖

公名瓘字瑩中劍州人中甲科官博士朝議毀資治通鑑公引神宗序命題得沮徽宗立遷左司諫極論惇卞之惡尋出外召擢給事中忤曾布斥知泰州坐子正彙計蔡京竄台州脅取尊堯集窘辱百端終莫能害宣和六年卒紹興間謚忠肅此札紙本高八寸餘闊一尺二寸大行書十二行清勁有山陰典型

瓘啓仲冬嚴寒伏惟尊候萬福瓘蒙恩遷敘兩官昨日祇授聖恩深厚無以論報拜命感涕而已五八娘已成親十娘在後月恐知之七六行謹此上問餘乞保重不備瓘拜上 思濟使君大夫十三姐縣君十一月廿二日

陳侍御名醪帖

公名師錫字伯修建陽人熙寧中廷試帝親擢第三  
調昭慶軍掌書記郡守蘇公軾倚以爲政蘇公得罪  
詣臺獄親朋多畏避公獨出錢且安輯其家徽宗初  
拜殿中侍御史上言宣仁聖后有再安天下功請還  
司馬光等贈謚坐黨論削官置郴州卒年六十九此  
帖白紙高八寸七分闊九寸七分行楷八行

師錫頓首歲晏伏承德履休嘉辱手畢霑餉名醪野人豈  
當厚賜仁者之粟懷惠爲多餘面謝不一師錫頓首  
方迴監郡宣德執事

蔡丞相節夫帖

京字元長仙游人熙寧中進士使遼還拜中書舍人  
與弟卞同掌書命朝廷榮之徽宗初被論居杭依附  
童貫入爲右僕射屢罷屢起不軌不忠卒致宗社之  
禍欽宗立貶儋州至潭死年八十天下以未正典刑  
爲憾性嗜書自名一家此札粉紙高九寸闊一尺二  
寸二分行草十行大八分

京再拜昨日終日遠勞同詣下情悚感不可勝言大暑不  
審還館動靜何如想不失調護也京緣熱極不能自持疲  
頓殊甚未果前造坐以悚忤謹啓代面敘不宣京再拜  
節夫親契坐前

蔡樞密雪意帖

卞字元度與兄京同年登科安石壻也紹聖中拜尚書左丞專託紹述之說上欺天子下脅同列性深阻寡言中傷善類凡八百三十家惇雖鉅姦猶在衛中徽宗時知樞密院一以婦翁所行爲至當政和末謁歸上冢道死謚文正紹興後追貶此札紙本高八寸六分闊一尺大行書八行筆勢飄逸但未圓熟

卞拜履雪意殊濃咄晦大洽殊爲可慶蒙賜答誨尤以感慰適行首司呈賀雪笏記似未穩試爲更定如可用卽乞令寫上也不備卞拜履 四兄相公坐前

張丞相收錄帖

商英字天覺蜀人章惇薦擢御史撫事侵樞臣謫貶  
哲宗親政召爲司諫積憾元祐大臣不用已極力攻  
訾至毀宣仁太后比之呂武其無忌憚如此大觀中  
與蔡京立同異迨爲相小變其政故以傾詖之行竊  
忠直之名宣和間卒紹興時謚文忠天下皆不謂然  
云此札紙本高九寸闊一尺四分字大七分九行

商英惶恐女夫王滌之蒙收錄八月七日已解商水任薦  
格餘溢遂可改京商英受賜與王氏均等今第二女夫楊  
開還蜀輒令請見或恐下問河東北間事蓋楊生從商英  
者二年矣伏恐上知商英惶恐再拜



章丞相會稽帖

惇字子厚浦城人登甲科熙寧中安石悅其才用爲  
三司條例官迨元祐初知樞密院于簾前爭辨役法  
語惇慢出知汝州哲宗親政起爲左僕射專以紹述  
爲能引用羣姦協謀報復詆宣仁太后爲老奸請斬  
司馬光呂公著棺幸帝不聽起同文館獄命蔡京等  
窮治又以孟后爲宣仁所立勸帝起掖廷獄託左道  
廢后窮凶稔惡徽宗立貶潭州又貶雷州徙睦州卒  
此札白粉箋高八寸闊八寸六分行書六行

會稽尊候萬福承待次維揚想必迎侍過浙中也宜興度  
應留旬日二十間必於姑蘇奉見矣冀盡從容惇別紙

張諫議東來帖

公名舜民字耘叟邠州人中進士第令襄樂上書斥  
新法士論壯之元豐中坐靈武詩貶會赦北還徽宗  
立擢諫議大夫居職纔七日封事六十上尋坐元祐  
黨謫復集賢殿修撰卒公慷慨喜論事善爲文自號  
浮休居士云此札紙本高八寸闊一尺五寸書十二  
行宋印三方

舜民再啓東來之人日聞動止獨以疎庸困於賓旅仁民  
兼愛宜以此諒也別後如聞有愛女之戚不審事後中外  
如何使節機槍者一年和賤子兩遭起動今則遠矣奈何  
長沙雖是舊游人今老矣奚能爲也已請覲矣必治陸行  
大約秋冬之交可以登途一生契故寧無贈意至望至望  
舜民頓首

又潭州帖

研花箋本高七寸六分闊一尺一寸行草三行

又得潭州法帖一部會去人速不及裱褙希勿罪也舜民頓首

劉少宰褒除帖

正夫字德初元豐間南省奏名犯諱當黜宣仁太后  
命寘末級除左司諫解蔡邱獄政和中擢少宰以疾  
致仕封康國公東歸賜詩畫硯筆寵行獻詩以謝歸  
至盱眙卒年五十六謚文憲喜學書多作行法

正夫頓首又啓遠辱手翰得聞佳履殊用慰感正夫乍至  
都下公私擾忤敘布草略惟亮幸甚他冀珍賚以需褒除  
正夫頓首

劉侍御穎叔帖

達字公度隨縣人進士高第歷官中書門下侍郎初  
附蔡京躡進京敗稍反其政後爲趙挺之所賣余深  
等攻逐之星變以祠使召及都而卒年五十此札白  
紙高九寸三分闊一尺二寸行書十行

達啓辱七月五日賜教承已西上今想對還當有休嘉也  
秋暑未熄伏惟動止佳福達山間粗好兒女來歸已餘月  
老年如夢寐間耳未緣款晤千萬爲國加愛爲國加愛不  
宣達上穎叔制置大夫閣下 八月六日

林樞密右司帖

據字彥振福州人徙蘇以蔭爲員外郎賜進士第除  
開封尹治張懷素獄蔡京故與懷素游密得交關書  
請悉焚蕩京德之遂進同知樞密院集英牘唱據當  
傳姓名不識甄益字御史論其寡學黜知滁州復起  
知揚州拜節度使論罷卒年五十九此札紙本高八  
寸八分闊一尺餘大行書十行

據頓首啓比不承誨下情渴仰知數辱訪皆失迎對但深  
愧感蒙教伏審晚來尊候萬福峴刻已領早暮當卜祗詣  
遞中馳拜覆不宣據再拜 右司彥和尊兄坐前

陳待制詩帖

陽字晉之福州人中紹聖制科官至顯謨閣待制提  
舉醴泉觀徽宗初嘗進迂衡集勸導紹述趙挺之又  
薦其所著樂書貫穿明備給札上之卒年六十八此  
帖牙色紙高一尺餘闊一尺行書八行無款

行藝當年帝所聞聲名久矣動簪紳文場秉筆淵源厚師  
席談經業履醇白髮忽驚蒿里暮青衫難問箬溪春兩京  
模範垂芳遠多少生徒淚滿巾

薛修撰三詩帖

公名紹彭字道祖自謂河東三鳳後人居長安官祕閣修撰出轉河東漕書名亞米南宮而緊密藏鋒得晉宋人遺意符祐間號稱能書此帖粉箋高八寸闊一尺八寸行書絕句三首共十二行

簇簇深紅間淺紅苦才多思是春風千邨萬落花相照盡日經行錦繡中

村落人間桃李枝無言風味亦依依可憐憔悴蓬蒿底蜂蝶不知春又歸

十日狂風桃李休常因酒盡覺春愁泰山爲麴釀滄海料得人間無白頭



李殿中鄰蔭帖

時雍字致堯號適齋官殿中丞崇寧間與米南宮同  
爲書學博士嘗對御書跨龍二字字及半宮人簪花  
滿鬢由是聲名高壓米上又嘗以書流播外國內出  
絳紗封臂非奉詔不得書因濡墨襟袖作大字而結  
體嫵媚別自成一家此札紙本色深沉高九寸五分  
闊一尺六寸書九行宋印三方

時雍惶恐再啓曩者久依鄰蔭每款餘訓實爲幸會遠  
寢久恨悵深極伏承下諭使部諸况索漠實爲縈滯良鬱  
興議上方擇任耆俊如公豈久外者翹聽迅召入踐華劇  
下情不任頌願時雍惶恐再啓

周待制頓首帖

公名邦彥字美成錢塘人元豐初獻汴都賦萬言神  
宗召赴政事堂自諸生一命爲正仕至徽猷閣待制  
知順昌徙處州卒年六十六公善度曲製樂府傳世  
此札白粉箋高約九寸闊一尺行書五行

邦彥頓首啓前日特辱降顧閒冷之中倍增感激負疴屏  
迹造謁不逮第深悚惕邦彥頓首啓

何侍郎屏居帖

公名稟字文績仙井人政和五年進士第一欽宗立  
進中書侍郎極論割河北三鎮非是帝頗悟京城失  
守從幸金營不食死建炎初贈大學士此札紙本高  
八寸闊一尺四寸餘墨氣稍渝宋印三方精燥

稟再啓稟以不智與時背馳屏居滎陽稍習閒靜向來曲  
折世俗自以不至艱勞今不復能然矣滎陽當車馬衝過  
客游士尚復存訪輒避之郊野中窮礪谷緣巖壑往往忘  
返乃煩高義問勞不忘顧何以承之但增感戚無緣面晤  
不勝依依稟再拜

又卽辰帖

紙本高八寸闊一尺五寸六分行書二十一行

稟拜覆姑夫都大提刑寶謨郎中姑姑令人卽辰六月徂

大觀錄卷四

羣怡寄軒

暑稼寶告登恭惟疊組輝華宸眷益懋尊候神贊動止萬福稟不振之蹤累侍所生殿門忍貧仰藉鴻休知感知自比嘗一再貢狀嗣以無謂弗敢溷籤史若瞻依一忱則息未始少替鄉間霽雨露足日來晴炎泉流易涸目今更得甘澤一飽可指期矣江右擾擾聞已平戢威惠所孚固宜屏跡知縣表兄微恙已遂向安深切慶忭內除尊表安問如織兩院嬖人尊候曼福禁從之拜鄉里應有驅策伏聽嚴戒不備稟拜覆